

Bosna i Hercegovina
Federacija BiH
Kanton Sarajevo
Skupština Kantona Sarajevo
n/r g. Elmedin Konaković, Predsjedavajući Skupštine

ZASTUPNIČKO PITANJE

Četrnaesta radna sjednica Skupštine Kantona Sarajevo

Pitanje:

Zamolio bih nadležne da mi daju pismeni odgovor na pitanje: Da li Komisija za pravdu, ljudska prava i građanske slobode još uvijek postoji i zasjeda, tj. koliko se puta do sada sastala i koliko je predmeta do sada riješila?

Obrazloženje:

Postoji više razloga zašto ovo pitam, ali niti jedan od njih nije taj što je predsjednica ove komisije na zvaničnoj web stranici Skupštine Kantona Sarajevo, na kojoj je objavljen prikaz aktivnosti kantonalnih zakonodavaca, prikazana kao najmanje aktivna zastupnica. Svjestan sam da "top lista" najaktivnijih zastupnika objavljena na zvaničnoj stranici SKS ne mora nužno značiti da se radi i o najmanje aktivnoj predsjednici jedne skupštinske komisije tako da to nije razlog zašto postavljam ovo pitanje.

Doduše jedan od razloga zašto postavljam ovo pitanje jeste taj da su oni koji rade na web stranici SKS bili aktivni u vezi aktivnosti zakonodavaca, ali veoma malo aktivni u vezi aktivnosti Skupštinskih komisija, jer se na službenoj stranici Skupštine Kantona Sarajevo gdje je predstavljen rad skupštinskih komisija ne mogu pronaći podaci o radu i sjednicama niti jedne komisije osim Prve sjednice Komisije za mlade.

Pošto, za razliku od rada komisije kojom sam do sada predsjedavao, a koji je bio jako dobro praćen i pokriven u nekim medijima (pa čak i previše, jer me kritikuju čak i zbog nečega što nisam uradio, tj. lažno me predstavljaju kao radnika čak i onda kada nešto ne uradim), javnost do sada nije bila u prilici upoznati se sa radom, ili eventualnim neradom Komisije za pravdu, ljudska prava i građanske slobode, pa bih želio doći do te informacije i sam je predočiti javnosti putem svojih medija.

No osnovni razlog zašto bih htio raspolagati tom informacijom i komunicirati tu informaciju javnosti jeste taj što sam ja član te komisije.

Kao član te komisije do sada sam primio samo jedan poziv na Prvu i, za sada pretpostavljam, jedinu sjednicu ove komisije koja je održana 24. januara tekuće godine (prije devet mjeseci) na kojoj, nažalost, nisam bio u mogućnosti prisustvovati. Stoga imam potrebu izraziti svoju zbunjenost i zabrinutost, i iznijeti više dodatnih pitanja koja me muče po ovom pitanju.

Naime, ako su u međuvremenu održane i druge sjednice o kojima nisam bio obavješten, htio bih znati zašto nisam bio pozvan na njih i, ako jesam, gdje je zapelo. Drugim riječima, pitam se:

1. Da li sam u međuvremenu izbačen iz te komisije?

2. Da li sam nepoželjan u toj komisiji (persona non grata)?
3. Da li su se pozivi na sjednice te komisije negdje zagubili u e-mailu?

Ako ništa od gorenavedenog nije slučaj, onda ne znam da li da se kao građanin i zastupnik ove Skupštine zabrinem ili obradujem radom, tj. neradom te komisije. Drugim riječima, pitam se:

1. Da li to što komisija ne zasjeda znači da u Kantonu Sarajevo nema nepravde, tj. da su ljudska prava i građanske slobode na zavidnom nivou?
2. Ili to može značiti da je stanje ljudskih prava i građanskih sloboda u Kantonu Sarajevo pogoršano zbog nerada ove komisije.

Jer ako se ispostavi da Komisija za pravdu, ljudska prava i građanske slobode zaista nije održala niti jednu sjednicu u devet mjeseci, i ako se ispostavi da su građani nezadovoljni stanjem ljudskih prava i građanskih sloboda u Kantonu Sarajevo, ako, nedajbože, neko nezavisno istraživanje neke nevladine organizacije pokaže da su ljudska prava i građanske slobode ugroženi, da su na najnižem nivou ikad, i to upravo u vrijeme vladavine te famozne i izvikane "Šestorke" koju Zapad toliko podržava, onda bi to neki zlonamjernici, neki mediji i portali mogli interpretirati, između ostalog, i neradom predsjednice i članova Komisije za pravdu, ljudska prava i građanske slobode.

A pošto sam ja, ponavljam, član te komisije, razumjećete moje strahovanje i moju potrebu (ako se zbilja radi o devetomjesečnoj pauzi u radu komisije), da se zaštitim i ogradim, te da ujedno iskoristim priliku da kao građanin, kao zastupnik, kao član te komisije, ali i kao predsjednik u ostavci Komisije za obilježavanje, čuvanje i njegovanje historijskih događaja i ličnosti, izrazim ne samo nezadovoljstvo i negodovanje radom, tj. neradom Komisije za pravdu, ljudska prava i građanske slobode, već i svoju zabrinutost i strahovanje da bi se moglo raditi o mogućoj političkoj blokadi rada ove komisije.

Iskreno želim vjerovati da se radi samo o običnom zastoju u komunikaciji, a ne i u radu ove komisije, te stoga molim da mi se dostavi odgovor u pismenoj formi i da me se izvijesti o dosadašnjem radu, kao i da me se ubuduće poziva na sjednice ove komisije.

Isto tako molim da se ti pozivi, zajedno sa pozivima na sjednice svih ostalih komisija (pozivima koji sadrže i dnevni red sjednica) uredno i propisno postave na službenu stranicu Skupštine Kantona Sarajevo kako građani i građanke Kantona Sarajevo ubuduće ne bi bili manipulirani od strane medija, već pravovremeno izvješteni o radu i dnevnom redu sjednica komisija njihove Skupštine. Propust koji je do sada načinjen od strane administratora ove stranice meni je nanio veliku štetu po pitanju javne percepcije mog političkog lika i djela, otvorio je prostor za špekulacije i izmišljotine o mom radu kao dosadašnjeg predsjednika jedne komisije, te stoga ne želim da se isto ponovi mojim uvaženim kolegama i kolegicama.

Sarajevo, 30.10.2019. godine

Samostalni zastupnik u Skupštini Kantona Sarajevo

Damir Nikšić

